

or goostly, or noon; if any of thy kynrede have synned with hire or noon, and manye mo thynges. Another circumstaunce is this; wheither it be doon in fornicacioun, or in avowtrie, or noon; incest, or noon; mayden, or noon; in manere of homicide, or noon; horrible grete synnes or smale; & how longe thou hast continued in synne. The thridde circumstaunce is the place ther thou hast do synne; wheither in oother mennes hous or in thyn owene; in feeld or in chirche, or in chireheawe; in chirche dedicaat, or noon. For if the chirche be halwed, and man or womman spille his kynde inwith that place by wey of synne, or by wikked temptacioun, the chirche is entreddited til it be reconciled by the bysshop; and the preest that dide swich a vileynye, to terme of al his lif, he sholde namoore synge masse; & if he dide, he sholde doon deedly synneat every time that he so synge masse. The fourthe circumstaunce is, by whiche mediators or by whiche messagers, as for enticement, or for consentment to bere compaignye with felaweshipe; for many a wrecche, for to bere compaignye, wil go to the devel of helle. Wherfore they that eggen or consenten to the synne been parteners of the synne, & of the dampnacioun of the synner. The fifthe circumstaunce is, how manye tymes that he hath synned, if it be in his mynde, and how ofte that he hath falle. For he that ofte falleth in synne, he despiseth the mercy of God, and encreaseth hys synne, & is unkynde to Crist; and he wexeth the moore fieble to withstonde synne, and synneth the moore lightly, and the latter ariseth, and is the moore eschew for to shryven hym, namely, to hym that is his confessour. For which that folk, whan they falle agayn in hir olde folies, outhur they forleten hir olde confessours al outrely, or elles they departen hir shrift in diverse places; but soothly, swich departed shrift deserveth no mercy of God of his synnes. The sixte circumstaunce is, why that a man synneth, as by temptacioun; & if hymself procure thilke temptacioun, or by the excitynge of oother folke; or if he synne with a womman by force, or by hire owene assent; or if the womman, maugree hir hed, hath been afforced, or noon; this shal she telle; for covetise, or for poverté, and if it was hire procuryng or noon; & swiche manere harneys. The seven the circumstaunce is, in what manere he hath doon his synne, or how that she hath suffred that folk han doon to hire. And the same shal the man telle pleyntly, with alle circumstaunces; and wheither he hath synned with comune bordel-wommen, or noon; or doon his synne in hooly tymes, or noon; in fastynges, tymes, or noon; or bifrom his shrifte, or after his latter shrifte;

and hath, peraventure, broken therfore his conseil; by sorcerie or craft; al mooste toold. Alle thise thynges, after that they been grete or smale, engreggen the consciene of man. And eek the preest that is thyngement in yevyng of thy penance, & that wel, that after tyme that a man hath defouled his baptesme by synne, if he wole come to salvacioun, ther is noon other wey but by penitence & shrifte and satisfaccioun; and namely by the two, if ther be a confessour to which he may shryven hym; and the thridde, if he have lyf to parfournen it.

CHANNE shal man looke and considere, that if he wole maken a trewe and a profitable confessioun, ther moste be foure condiciouns. first, it moot been in sorweful bitternesse of herte, as seyde the kyng Ezechias to God: I wol remembre me alle the yerres of my lif in bitternesse of myn herte. This condicioun of bitternesse hath fyve signes. The firste is, that confessioun moste be shamefast; nat for to covere ne hyden his synne, for he hath agilt his God & defouled his soule. And therof seith Saint Augustyn: The herte travailleth for shame of his synne; and for he hath greet shamefastnesse, he is digne to have greet mercy of God. Swich was the confessioun of the publican, that wolde nat heven up his eyen to hevene, for he hadde offended God of hevenc; for which shamefastnesse he hadde anon the mercy of God. And therof seith Saint Augustyn, that swich shamefast folk been next foryevenesse and remissoun. Another signe is humylitee in confessioun; of which seith Saint Peter: Humbleth you under the myght of God. The hond of God is myghty in confessioun, for therby God foryeveth thee thy synnes; for he allone hath the power. And this humylitee shal been in herte, and in signe outward; for right as he hath humylitee to God in his herte, right so sholde he humble his body outward to the preest that sit in Goddes place, for which in no manere, sith that Crist is sovereyn and the preest meene and mediator bitwixe Crist and the synner, and the synner is the laste by wey of rescoun, thanne sholde nat the synner sitte as heighe as his confessour, but knele bifrom hym or at his feet, but if maladie distourbe it. For he shal nat taken kepe who sit there, but in whos place that he sitteth. A man that hath trespassed to a lord, and comth for to axe mercy and maken his accord, and set him down anon by the lord, men wolde holden hym outrageous, and nat worthy so soone for to have remissoun ne mercy. The thridde signe is

how that thy shrift sholde be ful of teeris, if man may; and if man may nat wepe with his bodily eyen, lat hym wepe in herte. Swich was the confessioun of Saint Peter; for after that he hadde forsake Jhesu Crist, he wente out and weep ful bitterly. The fourthe signe is, that he ne lette nat for shame to shewen his confessioun. Swich was the confessioun of the Magdelene, that ne spared for no shame of hem that weren atte feeste, for to go to oure Lord Jhesu Crist & biknowe to hym hire synnes. The fifthe signe is, that a man or a womman be obeisant to receyven the penance that hym is enjoyned for his synnes; for certes, Jhesu Crist, for the giltes of a man, was obedient to the deeth.

THE seconde condicion of verray confessioun is, that it be hastily doon; for certes, if a man hadde a deedly wounde, evere the longer that he tariet to warisshe hymself, the moore wolde it corrupte and haste hym to his deeth; and eek the wounde wolde be the wors for to heele. And right so fareth synne, that longe tyme is in a man unshewed. Certes, a man oughte hastily shewen his synnes for manye causes; as for drede of deeth, that cometh ofte sodenly, & is in no certeyn what tyme it shal be, ne in what place; & eek the drechunge of o synne draweth in another; and eek the longer that he tarieth, the further he is fro Crist. And if he abide to his laste day, scarcely may he shryven hym, or remembre hym of his synnes, or repenten hym, for the grevous maladie of his deeth. And forasmuche as he ne hath nat in his lyf herked Jhesu Crist, whanne he hath spoken, he shal crie to Jhesu Crist at his laste day, and scarcely wol he herke hym. And understond that this condicioun moste han foure thynges. Thi shrift moste be purveyed bfore and avysed; for wikked haste dooth no profit; and that a man konne shryve hym of his synnes, be it of pride, or of envye, and so forth of the speces and circumstaunces; & that he have comprehended in hys mynde the nombre and the greetnesse of his synnes, and how longe that he hath leyn in synne; & eek that he be contrit of his synnes, and in stidefast purpos, by the grace of God, nevere eft to falle in synne; and eek that he drede & countrewaite hymself, that he fle the occasions of synne to whiche he is enclined.

AL SO thou shalt shryve thee of alle thy synnes to o man, and nat a parcel to o man and a parcel to another; that is to understonde, in entente to departe thy confessioun as for shame or drede; for it nys but stranglyng of thy soule. For certes, Jhesu Crist is entierly al good; in hym nys noon imperfeccioun; and therefore

outhur he foryeveth al parfitly, or never a deel. I seye nat that if thou be assigned to the penitauncer for certein synne, that thou art bounde to shewen hym al theremaunt of the synnes, of which thou hast be shryven to thy curaate, but if it like to thee of thyn humylitee; this is no departyng of shrifte. Ne I seye nat, theras I speke of divisioun of confessioun, that if thou have licence for to shryve thee to a discreet and an honeste preest, where thee liketh, and by licence of thy curaate, that thou nemayst wel shryve thee to him of alle thy synnes. But lat no blotte be bihynde; lat no synne been untoold, as fer as thou hast remembrance. And whan thou shalt be shryven to thy curaate, telle hym eek alle the synnes that thou hast doon syn thou were last yshryven; this is no wikked entente of divisioun of shrifte.

AL SO, the verray shrifte axeth certein condiciouns. first, that thou shryve thee by thy free wil, noght constreyned, ne for shame of folk, ne for maladie, ne swiche thynges; for it is rescoun that he that trespasseth by his free wyl, that by his free wyl he confesse his trespas; and that noon oother man telle his synne but he hymself; ne he shal nat nayte ne denye his synne, ne wrathe hym agayn the preest for his amonestyng to leve synne.

THE seconde condicioun is, that thy shrift be lawful; that is to seyn, that thou that shryvest thee, and eek the preest that hereth thy confessioun, been verrailly in the feith of hooly chirche; and that a man ne be nat despoired of the mercy of Jhesu Crist, as Caym or Judas. And eek a man moot accusen hymself of his owene trespas, and nat another; but he shal blame and wyten hymself & his owene malice of his synne, and noon oother; but nathelees, if that another man be occasion or enticere of his synne, or the estaat of a persone be swich thurgh which his synne is aggregated, or elles that he may nat pleyntly shryven hym but he telle the persone with which he hath synned; thanne may he telle; so that his entente ne be nat to bakbite the persone, but oonly to declaren his confessioun. Thou ne shalt nat eek make no lesynges in thy confessioun; for humylitee, peraventure, to seyn that thou hast doon synnes of whiche that thou were nevere gilty, for Saint Augustyn seith: If thou, bycause of thyn humylitee makest leasynges on thyself, though thou ne were nat in synne bifrom, yet artow thanne in synne thurgh thy leasynges. Thou most eek shewe thy synne by thyn owene propre mouth, but thou be woxe downb, and nat by no lettre; for thou that hast doon the synne, thou shalt have the